

Hüt am Gümpelimitwoch Obed,
wo überall scho d'Fastnacht tobed,
und öppe eine s'Gwüsse ploged,
will er sich z'wiit uf's Glatteis gwoged,

erklär ich wieder eimol meh
im Name vo de FGW,
de Wiler Bögge gross und chli:
Offiziell soll si hüt eröffnen si !

Als Herold isch es mini Pflicht,
z'verläse de närrisch Johrespicht,
deshalb ihr liebe Wiler Narre
hau is öppe eim an Charre !

Ich fang a mit em Tumbler-Sepp,
das isch doch würlkli scho en Depp;
tuet zum Blocher übere laufe,
und d'AP de Spitex verchaufe !

Am Blocher hani drum en Rot,
denn jetze isch es nonig z'spot:
Lo di nöd mit en Tumbler ie,
susich goht's bachab mit dir au glie !

Hu ä Lotsch !

Geschter bin ich durch Wil flaniert,
und ha do öppis nöd kapiert;
d'Wienachtsbelüchtig all no brennt,
hät ächt de Amstutz no Advent ?

Hu ä Lotsch !

De Velodieb

D'Suva macht e Aktion,
mit Velohelm verschenke;
diä Hirnschutz Prävention,
tuet d'Ufmerksamkeit uf sich lenke !

All Velofahrer halted a,
de Armin Näf vor Polizei,
er hilft de SUVA ebe da,
dass alls si Ornig hei !

Zmol halted au es Taxi a,
de Guido Wick stiegt us:
Chan ich en Helm au gratis ha ?
De Näf chunt nümme drus !

Er klärt ihn uf: S'isch äbe so,
wotsch s'Velohelmi gratis ha,
muesch mit em Velo cho !
Sofort kapiert's dä grüeni Ma !

Er macht en Spurt zu de Allee,
nimmt us em Veloständer us,
eifach es Velo, mir händs gseh.
Und mit em letschte Pfus,

fahrt üsen Taxifahrer Wick
mit klautem Velo a;
und froged, ich findes scho dick:
Chan ich en Helm jetzt ha ?

Ich frog mi nu, was das sött nütze,
er trait am Hirni jo nöd schwär,
was wött de Wick denn au no schütze,
sin Grind isch lang scho läär !

Hu ä Lotsch !

En tüüre Schlof

Ich hammer letschti säge lo,
s'Landhus tåg wieder uf,
me chöni wieder ine go,
de Sascha segi wieder druf !

Das loht sich ein nöd zweimol säge,
dä vo de Tüüfgarasch;
am Chappe-Walter chunt das gläge
er findet's kei Plamasch,

dass er mit es paar Fründe goht,
es Bierli zwei go trinke;
es wird denn doch no ziemli spoht,
er loht de Chopf glie sinke !



Rund ume tönd diä Meitli strippe,
doch das loht üsen Walter chalt,
er läärt no eine hinder d'Rippe,
isch er für Sex ächt doch scho z'alt ?

Vor luuter Müedi schloft er ie,
d'Kollege chönd's nöd fresse;
en Table-Dance zahled's ihm glie,
uf das isch er versesse !

Wo denn eini vor ihm strippt,
chan er's nöd richtig gnüsse,
er hät z'viel Spezi hindere kippt,
und schnarchled, s'isch zum schüsse !

Punkt füfi wached er denn uf,
es sind scho alli gange;
de Walter wär jetzt besser druf,
doch alli lönd ihn hange !

De Barmaid mues er d'Zeche zahle,
und hät nüt gha devo;
en tüüre Schlof, fäsch under Quale,
mues jetzt au er hei go !

Wötsch s'nöchsch Mol gnüsse so en Strip,
gang ane wo di niemer kennt,
und jo kei Bier, das isch min Tip,
will Alkohol macht impotent !

Hu ä Lotsch !

De Neschtbeschnutzer

Um de Spitol gits au kei Rue,
das liet mer scho no uf em Mage;
zwor mached's en zum Glück nöd zue,
doch ghört mer immer wieder chlage !

Und öppis find ich intressant,
chlage tönd nöd d'Patiente;
sie rüemed en, das isch bekannt,
doch hegs im Aertzteteam Regente !

Verkaufspreis

ab Fr. 1.—

inkl. Mehrwert-
Beleidigungs-
und Föbü-Steuer.

D'Verena Gysling, das fällt uf,
tuet geg s'Spitol gern schüsse,
Insider-Infos sind au druf,
woher sie's hät, würd ich gern wüsse !

Mir goht zmol so es Liechtli uf,
e Schlamm Schlacht isch das gsie,
diä Plauderei raubt mir de Schnuf,
chönt's ächt au Zuefall sie ??

Weiss ihre Fründin Mäuserfrau
ächt meh als anderi Lüt ?
De Mäuserma weiss alls doch au,
doch sött er jo verzelle nüt !
Am Ayer rot ich, tue verlange,
vom Aertzteteam Loyalität,
nu wer am Chef au hebed d'Stange,
zeigt echt Charakter-Qualität !

Wär das nöd hät isch fehl am Platz,
mir lönd üs das nöd büte;
so Aerte-Type sind für d'Chatz,
wüsched z'erscht vor eure Hütte !

Drum Ayer, ich würd en vermissee,
vor dim Spitol zück ich de Huet;
häsich d'Niete endlich use gschmissee,
goht's üs allne wieder guet !

Hu ä Lotsch !

De Altstadtkönig

Ich kenne ein, mit Sammlerherz,
sammled persönlich, s'isch kein Scherz,
Underschrifte für's Spitol,
und für Schranke au no zmol !

Er isch Experte, selbscht ernannt,
im Altstadtli als Boss bekannt;
er tuet au gern es Podium leite,
lenkt schuelischi Begebeite;

das aber indirekt über d'Frau,
diä macht Politik halt au !
Jetzt rot emol, wär das chönt sie,
a de Hoseträger känsch en glie !

Im Geschäft macht er so sexy Robe
tuet gäge Parkgebühre tobe.
Du bisch verrote Kurt Schmid, sorry,
als wiet und breit de gröschti Schnorrey !

Hu ä Lotsch !

Und jetzt noch dene lange Gschichte
bricht ich vo wietere Bösewichte;
i churze Vers, verzell vo Panne,
und haue öppe ein i'd Pfanne !

D'Alice vom Central, lachsch der Schränz,
macht em Dönni Konkurrenz;
chaufft en Block und schrieht döt druf,
alli Autonummere uf !

En jede büesst sie garantiert,
wo sis Auto dött parkiert;
nu Alice, blibsch denn zmol eleige,
will tosch di eigne Gäscht verzeige !

Hu ä Lotsch !

E hochi Ehr händ mir erfahre;
obwohl de Bund echli mues spare,
bsuecht de Ogi üseri Stadt.
Nu find's er nöd so chaibe glatt,

wo ihm de Bachma usrichte mue,
de Hartmann heg halt gschieders z'tue;
er lös sich doch, jetzt chunt en fiese,
vom Dölf nöd d'Ferie vermiese !

Hu ä Lotsch !